

Il 26 d'avrel: Sogn Anacletus e sogn Marcellinus, papas e marters



Sogn Anacletus ei staus in fegl d'in niebel Roman cul num Emilian. El fuva convertius e battegius digl apiestel sogn Pieder. Sco discipel d'in schi grond meister ha el era en pietad ed en vertids ton bein sepperfecziunau ch'el vegneva tenius per in exempel e spieghel da tuts spirituals che garegiavan da salvar lur olma ed era quellas da lur proxim.

El fuva in um da grond spért, sabientscha, prudientscha e buontad. Muort tontas bunas qualitäts eis el vegnius consecraus uestg da sogn Pieder per instruir e vegliar sco bien pastur quels carstgauns converti che setenevan si ordeifer il marcau da Ruma. Sia premura, carezia e migeivladad gudignavan ils cors dils pagauns che bandunavan sinquei lur errurs e suandavan igl exempel da sogn Anacletus. Suenter la mort da sogn Pieder ei sogn Linus daventaus papa e suenter il marteri da quei sogn papa ei sogn Anacletus succedius sin il tron papal en in temps da grondas persecuziuns entras igl imperatur Domizian.

Lez vuleva buca mo vegnir tenius per il signur da tut il mund, mobein era aunc esser aduraus per in diu. Sogn Anacletus cun aunc auters cartents protestavan encunter tala aduraziun. El mussava e perdegava publicamein ch'il sulet scaffider dil tschiel e dalla tiara seigi il ver Diu che duei vegnir aduraus. Sinquei ha Domizian persecitau pir che mai ils cristifideivels, ils quals vegnevan marvegliusamein confortai da papa Anacletus che schava sentir sigl entir mund sia carezia paterna. Ils paupers consolava el cun almosnas, ils travigliai cun brevs, ils tementai cun fermas admoniziuns e tuts retschevevan tier el e tras el agid tenor basegns. Il grond marcau da Ruma ha el sco ovra da sogn Pieder partgiu giu en 25 pervendas e provediu scadina cun in fervent augsegner.

Suenter che zacons melli cristians ein stai mazzacrai sut quei renomau tiran Domizian ei lu era sogn papa Anacletus vegnius pigliaus, encadenaus e mess en perschunia. Il desideri ed il legherment da saver endirar per amur da Diu fageva sesmarvegliar ils ministers dalla mort ch'ei prendeva ad els tutta speranza da puder tementar il sogn cun tgierls e turments. Per buca piarder temps cun mo vuler stermentar il sogn, ha il tiran sez priu la caussa enta maun ed immediat pretendiu il tgau da sogn papa Anacletus. Quei ei daventau il 26 d'avrel entuorn ils onns 90, suenter che Anacletus veva giu regiu la sontga Baselgia duront circa 12 onns. Siu tgierp ei vegnius satraus el Vatican sper quel da sogn Pieder e sogn Linus. Quei sogn papa ei staus igl emprem che metteva sisum sias brevs sco tgau: *Salutem et apostolicam benedictionem!* Quei vul dir: il salid e la benedicziun apostolica seigi sur da vus. Quella fuorma vegn aunc oz dada en las brevs dil papa.

Oz venerescha la Baselgia aunc in auter papa ensemen cun sogn Anacletus, numnadamein sogn Marcellinus che fuva era naschius a Ruma. El fuva in um virtuos cun particulars duns e che fuva muort sia pietad e perdertadad fetg stimaus dil clerus Roman, mo surtut da papa sogn Cajus, al qual el fageva biars buns survetschs per néz dalla sontga Baselgia. Suenter il marteri da sogn Cajus ei Marcellinus daventaus papa e gest da quei temps ch'ils imperaturs

Dioclezian e Maximian vevan concludiu da metter per tiara la sontga Baselgia cun ragischar ora tuts cristians. El secund onn da siu papat ei sogn Murezi vegnius cun sia cumpignia neu digl Orient a Ruma. Cheu eis el taluisa vegnius confirmaus dil papa en la vera cardientscha catolica ch'el e sia cumpignia han suffriu cun tafradad il marteri per amur da Jesus Cristus. La persecuziun encunter ils cristians carscheva di per di schi furiusamein ch'ei vegneva mintgadi pigl entir mund entuorn marterisau da quei da 15'000 carstgauns. Igl uffiern sez vess buca saviu patertgar ora turments e peinas pli snueivlas. Entirs vitgs e marcaus dils cristians vegnevan arsentai cun glieud e tut senza perdun e remischun ni a pign ni a grond, ni a ad um ni a dunna. Sogn Marcellinus schava buca sut da consolar e confortar ils cartents per ch'els restien statteivels a lur vera cardientscha. El rimnava ils corps dils sogns marters e satrava quels la notg cun tutta pusseivla honur.

Ina gada ha sogn Marcellinus gagliardamein turzegiau igl imperatur culs plaid: Jeu damondel vossa majestad, tgeinina ei la raschun che vus persecuiteis ils survients da Diu che fan nuot auter che urar per il beinstar dil reginavel? Sin quella gagliarda damonda lai igl imperatur bastunar il sogn papa sgarscheivlamein e lu relaschau el per quei di. Cuort temps suenter vegn el mess a fern en perschun e tenius en tuts graus mal. Mezs morts vegn il sogn lu menaus el tempel dil diu Jupiter. Cun da tuttas sorts smanatschas, turments ed empermischuns vulan els sfurzar il sogn papa d'adurar lur diu Jupiter. Ord spira fleivlezia humana e muort sia aulta vegliadetgna ha el tut tementaus priu dus garnetschs entscheins, mess quels egl entscheinser ed entschensau quei fauls diu Jupiter. Tras quei ein biars cartents stai cumbrigiain, pertgei ils pagauns han giu da quei il gaudi ed han lu schau ir el per siu fatg.

Il sventirau papa Marcellinus fuva liberaus dils turments corporals, denton buca dils spirtals. Beinspert ha el viu en il scandalus fatg ed ha entschiet a bargir sco sogn Pieder da lezzas uras. El trai en in ruh cilizi, springia siu tgau cun tschendra e va da libra voluntad el marcau Sassa, nua che 180 uestgs fuvan seradunai per secusseglar davart il travagliau stan dalla sontga Baselgia. Avon quella entira rimnada eis el sco penitent papa cumparius cun las larmas giu per la fatscha, sefiers giu en schanuglias e confessau publicamein siu falliment: el seigi buca pli vengonz d'esser dumbraus denter ils spirituals survients da Diu ed aunc bia meins da reger la sontga Baselgia. Lu ha Marcellinus rugau humiliteivlamein tuts per perdun e supplicau da dar si ad el la meritada penetienza. Ils uestgs han giu compassiun cun lur emprem cau zun humiliau ed unanimamein rispundiu ad el quell'uisa:

L'emprema sedia u cau dalla Baselgia vegn cheu sin tiara da negin truaus. Vus veis suandau igl exempel da sogn Pieder penitent che ha cun semegliontas larmas urbiu ora da Diu perdunament e misericordia. Seigies vus il vies derschader, pertgei ei tucca a vus da mirar sco vus leis reparar quei scandal che vus veis dau. Sin quella risposta dil sogn cussegl dat il papa la sentenza a sesez ch'el duegi esser suspendius sco cau dalla Baselgia e che siu tgierp dueigi vegnir satraus da negin suenter sia mort. Sinquei va el cun prescha a Ruma, seprenta avon igl imperatur Dioclezian, turzegia quel gagliardamein, perquei ch'el hagi tementau el cun smanatschas e cheutras fatg commetter in grond falliment. Ussa dueigi el vegnir neuadora cun ses turments, per ch'el sappi endirar per siu puccau e per siu scandal daus a sia sontga Baselgia. Sin tala tschontscha nunspitgada vegn Dioclezian schi vilas ch'el fa gest leu tagliar giu il tgau a sogn Marcellinus. Cun el ein aunc ils treis cartents Claudius, Cirinus ed Antonius vegni scavazzai.

Quei ei d'avein il 26 d'avrel digl onn 304. Ils corps da quels sogns marters ein restai in meins sin la piazza da mazzament senza fossa, perquei ch'igl imperatur veva surdau quels per vivonda a tgapers ed auters animals selvadis. Mo sogn Pieder ei cheu cumparius e cumandau ad in augsegner cul num Marcellus da dar ina honoreivla sepultura als sogns marters. Marcellus ha la notg clamau ensemen il clerus e cun tutta reverenza satrau quels treis sogns marters el santeri da Priscilla. Sogn Marcellinus veva guvernau la Baselgia durant siat onns, endisch meins e treis dis. Ed ussa suenter la sepultura vegn il sogn spiritual Marcellus elegius per siu successur.

Reflexiun

Era sche quei scandalus cass da sogn Marcellinus ei staus grevs per la Baselgia, eis ella adina restada ferma encunter las portas digl uffiern. Ella ha mai pudiu entras manzegas e faulsas ductrinas vegnir enganada ni menada naven dalla via dalla verdad, era sche enqualin prelat principal dalla Baselgia ei zacu staus schliats. Ord quei savein nus claramain cumprender che buca ils carstgauns, mobei Cristus sez ei il fundament e la petga dalla sontga Baselgia. Sogn Marcellinus ha reparau siu donn ch'el veva dau cul falliment cun sponder siu saung. Scadin che ha dau scandal a siu proxim carstgaun ei obligaus da ton pli spert suandar igl exempel da sogn Marcellin penitent e reparar il donn buca ch'ei neschi ordlunder scandalus plaids, tschontschas ni ovras. Daventa quei buc, lu sa il puccau buca vegnir perdunau. Weisb. Ribad.